

張文襄公奏議

張文襄公全集卷二十三

奏議二十三

粵省併征洋藥釐金應照奏案原數撥還洋款請

飭催撥解以歸墊款摺

光緒十三年八月初三日

竊查廣東辦理海防先後四次息借滙豐洋款銀五百萬兩有奇訂明分年分期歸還計每年應還本息銀七十餘萬兩至八九十萬不等先經奏准將本省商包洋藥釐捐八十萬兩專作歸還前借洋款本息之需嗣因奉行新章洋藥稅釐併征統歸稅務司辦理卽據原辦包釐商人於本年正月稟准退辦遵照新章由各關彙

收並經臣之洞於正月內奏請查照原案在於廣東洋關及六廠征收洋藥項下照商人包定原數每年劃藥釐銀八十萬兩按月勻解藩庫兌收作為歸還本省洋款事需已准總理衙門戶部會同議覆所奏歸還該省息借洋款自係要需應准屆期暫由海關洋藥釐稅內提撥應付等因咨行遵照在案茲據廣東布政使高崇基會同海防善後局司道詳稱查本年應還本省息借洋款共銀七十七萬九千二百餘兩近年鎊價增昂為數尙不止此從前商辦包釐按月解庫備支遇有期迫款鉅之時仍可提前催繳今改歸稅司開辦以後數月

之久未據解到絲毫前經電請總理衙門飭催奉准電復稅司已收有銀十二萬兩飭令提撥九萬兩現又奉准戶部咨在於前次撥贖並新收藥釐項下提撥銀九萬餘兩各等因即使如數撥解已屬不敷甚鉅乃卒之屢次電函往復久未撥解至六月二十日始准粵海關轉解紋銀一十一萬九千四百餘兩還期又近所短仍多以此類推以後收數固未必驟豐解期亦不能甚早現計本年自正月以至六月共五期應還洋欸本息連不敷鎊價共銀六十八萬九千餘兩因藥釐未據解到洋欸陸續屆期萬不得已將司局各庫要欸先行騰挪

墊付所有本省應支兵餉勇糧及擬解京協餉旗營加餉東北防費暨新例捐輸項下認解海軍衙門銀十萬兩皆已移緩就急挪墊一空轉瞬八月十四屆期又應籌還洋款銀十餘萬兩實屬挪無可挪墊無可墊竊思廣東庫項正當窘絀之時洋款一項本係指定藥釐歸還此乃粵省舊有之款戶部議准之案今驟少此大宗的款憑何支付目下兵勇糧餉急待補發京協各餉屢奉檄催若再遲延則各營有譁潰之虞部庫及各省要餉有延誤之咎洋款屆期不能再墊更有失信遠人扣抵關稅之慮且稅務司若本年不能解足八十萬兩則

本省挪墊之要需未付之洋款皆無從籌措一有貽誤關係非輕日夜焦思不知所以爲計合將本省支絀迫切情形及已墊未墊洋款數目切實聲明詳請奏咨飭催前來臣等覆核無異相應請旨敕下總理衙門戶部飭催該洋關趕緊照數撥解以憑撥還墊款支解要需及備還八月一期洋款之用且每年藥釐八十萬兩本係粵省竭力籌維勸諭包辦商人已經辦足之數今雖改歸稅司經理戶部自應仍照原數撥還方無窒礙如該洋關收數無多其應如何另籌的款抵還之處並請飭部速行議覆遵辦以免貽誤

硃批戶部速議具奏欽此

整頓潮橋鹽務摺

光緒十三年九月初六日

竊照潮橋鹽務爲粵省鹽課大枝自咸豐以來疲累日深前運同錢瑄欠課尤多經臣奏參嚴追並遴委潮州府知府朱丙壽兼署運同責令設法疏銷極力整頓查該埠疲困之故累在閩省汀州八埠八埠者汀州府所屬八州縣皆潮鹽行銷引地自經匪擾招商不前由官自行拆辦現在各埠運鹽係由潮州廣濟橋掣配溯流而上水陸迭更計程共八百餘里灘河險阻山路崎嶇運脚愈昂成本愈重以致甯化歸化清流三埠全被閩

私侵占潮鹽顆粒難銷閩販銷鹽潮埠賠餉虧累無窮此時補救之法惟有力紓商困或可稍挽頽綱查福建西路邵武等屬所行閩鹽自光緒八年已減釐金二成續又量減二成惟潮鹽引地未減而所抽釐金閩係招商包收諸多留難潮埠深受其累擬請閩省將江屬各埠鹽釐按照邵武各埠一律核減以示持平而輕潮本卽由潮埠按照閩省每年原包釐金之數再減二成代抽解繳如有短絀由粵照賠於閩釐無損而於潮綱有益似爲簡便易行至鹽務行銷之地率有抽捐地方官緝私經費一項惟江屬銷鹽旣少抽費如故商力實難



支持嗣後應將此項抽捐經費按銷鹽成數照繳以百  
二十票爲十成如銷不及成則繳費亦照成遞減如減  
釐節費以後再將各路私鹽兩省合力查緝鹺綱庶可  
日有起色飭由兩廣鹽運司英啟督同潮州府兼署運  
同朱丙壽籌議具詳前來臣查行鹽省分包抽鄰釐前  
四川督臣丁寶楨於黔岸引鹽卽係如此辦法著有成  
效厯有奏案可稽閩省鹽釐向係閩商包繳本非官辦  
若改由潮埠代抽不過略爲轉移而彼此均有裨益其  
應繳經費按照銷鹽成數抽繳亦極爲公允惟事隸閩  
省非粵之可得而專當經電商閩浙督臣楊昌濬疊准

函電覆稱減釐節費均可照辦包商辦至年底亦屆期滿卽以正月爲限交替接辦等因臣查現在餉力各省俱絀減釐節費深屬不易閩浙督臣獨能勉顧鄰綱力從樽節若非素矢公忠不分畛域曷克臻此其收繳詳細章程應俟閩省咨會到粵卽便飭行照辦並分飭各屬合力緝私毋任仍前充斥以期漸復舊觀  
硃批戶部知道欽此

粵省仍請專認寶源洋款其補解畿餉應聽戶部

酌核摺

光緒十三年九月初九日

竊查廣東代還滇桂借用寶源洋款尾數銀兩前經戶

部奏准由粵海關舊欠粵省兵餉並海防經費內劃抵在案嗣准戶部咨據粵海關監督增潤呈覆各節咨照到粵當經轉行司局籌議並與該監督商酌查原咨內稱廣東省應代還滇桂尾欠寶源洋款二十二萬六千餘兩本年二月奏明准照兩廣總督前奏卽在粵海關舊欠該省餉銀等款一百四十餘萬兩數內劃還原以該督原奏內稱粵海關應解該省兵餉並海防經費等款一出自該關常稅一出自該關洋藥正稅徵收亦無不足十年以後收數稍絀而經費開支浮糜以此知籌解無術並非實情該督與該關同官一省見聞必確且

該關原欠省銀一百四十餘萬兩之多僅令還銀二十  
二萬餘兩尙未及十分之二且分爲兩年解還尤不至  
稍形竭蹶是以議准奏令該關遵照辦理茲據該關監  
督呈稱此項並無徵存應還尾欠寶源洋款萬難設措  
請予改撥殊與該督前奏不符究竟此項銀兩該關能  
否籌解撥還應由該督與監督會同奏明辦理所請改  
撥之處戶部未便據咨議准等語臣等查寶源尾欠兩  
年分還銀二十二萬餘兩上年五月臣之洞原奏本係  
由粵海關欠解粵餉歸還部議未允令由粵省籌還至  
十一月臣之洞因奏請由粵認還卽以抵解舊欠近畿

防餉其不敷尾數分年解補嗣經部覆令由海關欠餉撥還本年未還寶源之款並撥上年粵省已墊還寶源之款其次解畿餉仍飭解部今該關監督增潤呈稱稅項無存萬難設措臣等與監督增潤商酌多次迄無切實辦法並准增電咨稱自同治十年洋藥六廠開辦起至光緒十三年正月十八日止共徵洋藥稅銀四百一十九萬餘兩除解過部庫及支銷各廠經費輪拖船價修葺輪船等項外應存銀一百一十一萬餘兩而伏莽經費海防經費兩項其解過銀一百七十八萬餘兩實不敷銀六十七萬餘兩現在洋藥稅釐併徵統歸稅務

司經理其向不符銀兩無款歸還以之抵還本省洋款  
萬難設措等語查該關所欠兵餉出自常稅所欠海防  
經費出自洋藥稅抵還寶源之款係在兵餉防費內移  
撥自應合常稅藥稅而並及乃關者但計藥稅之贏絀  
而置常稅於不論若此款與常稅無關也者所論殊未  
清晰且藥稅以支銷浮糜始告無餘否則以入抵出未  
至棘手查當日開辦六廠本由籌濟粵餉而設嗣後得  
魚忘筌漸失經始命意徒爲該監督增一支銷之款而  
於應解之防費反至延欠本非事理之平所稱解過部  
庫爲數恐亦無多然事歷多員並非增潤任內所欠今

該監督既以改撥爲請萬難設措爲詞臣之洞雖同官一省關務係其專司其積年出入款目騰挪牽搭豈能一一代爲會計謂舊欠者之何由致欠難措者之何法籌措現在洋欸期限甚迫臣等只與該關催索往返申辯而不先事豫籌臨渴掘井必至貽誤現督同藩司高崇基籌議惟有先其所急力求實際無論何欸需支均先行挪用以備解還寶源尾欠十二萬一千餘兩之數免致失信遠人上廩宸慮粵省鉅欸既經兩次認還其舊欠近畿防餉一項自屬無力兼認或照臣之洞上年十一月奏准原案卽以代還寶源之數扣抵或將上年

粵墊寶源三十萬四千餘兩並本年粵墊之款統歸該  
關補還戶部或應如何改撥如何停免之處應聽戶部  
核辦再部咨又稱粵海關自同治十一年開辦洋葯正  
稅起所支經費有無侵蝕濫支應由臣之洞一併清查  
海關局面寬綽開支六廠經費不免浮糜上年十一月  
臣之洞覆奏核減吸水門洋葯稅經費摺內業經詳晰  
陳明惟粵海關事體向多不按通行例章事隔多年無  
憑詢其確數自上年十一月奏定以後歲支銀十萬蓋  
自海緒任內漸從核減增潤任內核減尤多其以爲厯  
任支銷是否核實久已事過境遷追求旣無確據恐亦



無裨餉需應請免其再加清查以省案牘據海防等局員司道詳請覆奏前來所有粵省專認寶源洋欸其舊欠近畿防餉請由戶部酌核抵撥緣由謹會詞恭摺具奏再此案粵省係向粵海關索還欠餉該監督則力陳該關艱難所處之地不同自必各申其說此摺碍難與該監督會奏合併聲明

硃批戶部議奏欽此

派員周歷南洋各埠籌議保護摺

光緒十三年十月二十四日

竊臣於光緒十二年二月二十五日遵旨會同出使大臣張蔭桓具奏籌議外洋各埠捐船護商情形當經奏

派總兵銜兩江儘先副將王榮和鹽運使銜候選知府  
余璫先赴南洋有名諸島詳慎周歷飭將設官造船兩  
事一併密加商度以憑籌定切實辦法等因奉旨該衙  
門知道欽此當經總理衙門電致駐英荷日使臣轉告  
該國外部去後該委員王榮和等於十二年七月二十  
七日由粵起程先後往查各島埠情形均經隨時稟報  
頗爲詳悉本年七月各回粵東臣復面加考詢大抵設  
立領事一節事甚切要勢亦可行謹撮其大要爲我  
皇太后 皇上陳之查該委員等所歷南洋計二十餘  
埠先至小呂宋爲日斯巴尼亞國屬次新加坡次麻六

甲次檳榔嶼次仰江皆英國屬次日裏各附埠次加拉巴各附埠次加拉巴次三寶壠各附埠次泗里末皆荷蘭國屬次新金山之鉢打穩次雪梨次美利濱次亞都律省各附埠次哀司倫次哀司倫各附埠皆英國屬其抵小呂宋也華民分訴日人虐害情形懇請派官保護自籌經費緣該處華民五萬餘人貿易最盛受害亦最深該委員等詳查被害各案或挾嫌故殺或圖搶故燒甚至官兵徇私巡差訛詐暴斂橫征顯違條約當經擇要照會日官查辦時值土人聯名擬逐內地華工該委員等到呂其議遂寢綜核情形非設總領事不可其分

設正副各領事暨駐劄處所由總領事因地制宜擇員稟委以期妥洽其抵新加坡也與原設領事左秉隆往見坡督各官禮意尙洽該處華民十五萬人富甲各處除衙舍公產外所有實業華人居其八洋人僅得其二每年往來華工又最多英設華民政務司專理其事立法尙稱公允惟不向中國領事衙門報名情意既不聯絡而目擊招工客館作奸欺瞞無從禁止亦失保護之旨似應並由中國領事官稽查以重事權而免流弊至麻六甲檳榔嶼兩處與新加坡相連華商居多生意繁盛又附屬石郎阿國之吉隆埠卑力國之罽埠均尙知

保護華工華人開采錫礦者十餘萬眾富至百萬者數人服飾禮儀一如故鄉無所改換檳榔嶼一埠人材聰敏爲諸埠之冠宜添設副領事一員與駐坡領事相助爲理益可以收後效其抵緬甸之仰江也該處華人三萬餘眾設有甯陽會館及各公司該員徧加訪查出產以米石爲大宗寶石牛皮等物次之自英據其地收餉設戍密邇騰越爲中國隱患此處宜設副領事聯絡商情必於邊事有益其抵日裏也該處爲原奏所未及華工亦萬餘眾來自汕頭等處先由客頭帶至新加坡檳榔嶼經英官查過自願傭工者訂立華文合同往日裏

爲傭所業種菸禁菸勤奮者年終可餘番銀百餘元否則不足糊口工頭以賭傾其資繼以稱貸第二年復須留工則返鄉無日查荷官洋文章程內載工人有過准園主送官訊辦不得私自鞭撻做工不得過三年之期限滿後無論有無虧欠園主皆應給予川資不得再留等語而園主陽奉陰違於華文合同內並不敘明任意虐待經該委員等告知荷官始允爲設法整頓此處宜設副領事以資保護其抵加拉巴也該處華民七萬餘衆荷人捐稅繁多賭風尤熾甚至迫令入彼國籍其附近之波哥內埠文丁內埠皆有華人聚處又有三寶瓏

與疏羅及麥里芬及泗里末惹加等處皆荷蘭國屬地  
華人二十餘萬衆荷官橫肆暴虐該委員等接見華商  
備言其苦中國如籌保護小呂宋而外當以加拉巴爲  
先該處宜設總領事兼辦三寶瓏等處事務於荷屬各  
埠華人加以恩義數十萬衆皆可內附其分設副領事  
一切與小呂宋同其抵新金山之鉢打穩埠也華工三  
千餘衆雪梨附近華人萬餘衆美利濱埠旺加拉打埠  
必治活埠叭拉辣埠紐加士埠市丹塔埠均屬新金山  
外埠惟庇釐市檳埠係英司倫之省城又有湯市噉路  
埠波得忌利士埠及谷當埠每處華人自數百至千餘

不等該委員皆勤加撫慰查新金山卽英屬澳土地利  
爲五大洲之一地方遼濶物產繁富多五金鑛產華人  
至者頗多英欲阻之特立收人稅之法每人納英金十  
鎊方准登岸間有收至三十鎊者似可援照美國總領  
事章程在雪梨大埠派設總領事一員總理雪梨及美  
利濱亞都律袞司倫各埠並紐討蘭島華人商務則華  
工得所庇倚謀生益覺有資其各埠副領事可卽令商  
人兼辦無須發給薪費此該委員等先後稟報籌辦及  
回粵後面加考詢之大略情形也臣查委員王榮和等  
于役南洋海程五萬餘里各埠商民覩漢官之威儀仰



夷天之覆幬莫不歡呼迎謁感頌皇仁其懇求保護之情極爲迫切查出洋華民數逾百萬中國生齒日繁藉此消納不少近年各國漸知妒忌苛虐驅迫接踵效尤若海上不安其居卽歸內地沿海驟增此無數游民何以處之故保護之舉實所以弭近憂而非以勤遠略也儻蒙朝廷設立領事加以撫循則人心自然固結爲南洋之無形保障所益匪淺該委員所到之處各該國洋官欸接照料禮意甚優英屬尤爲周至商及保護等事亦俱和平承允其議設領事一節英屬最爲欣然力勸速辦俾資約束荷日限於公法亦皆無辭相拒查小呂

宋距中國最近華民望切倒懸必須先設總領事駐劄其地以收遠近之心以伸華商之氣經臣電商張蔭桓擬派總兵銜兩江儘先補用副將王榮和爲駐劄小呂宋總領事緣該處閩人最多王榮和籍隸福建穩練精詳究心洋務素爲閩人所信服此次出差南洋親歷小呂宋各埠熟習情形深得窾要以之充當總領事人地實屬相宜應由該大臣先向日國商定發給憑照事宜再行奏明辦理隨准該大臣咨稱業經照會外部概允照辦而藩部以土人齟齬爲詞懼設官之後喧賓奪主礙其溢征是以至今延宕臣查各國通例凡立通使之

後即可派領事駐劄其地保護商人古巴等處中國早經設官小呂宋同爲日屬何獨不可應請旨飭下總理衙門與日使會商催令該國速發憑照不容推宕一面由臣咨會張蔭桓催促外部速辦此外商務較繁之埠應如何添設正副領事應俟小呂宋辦有規模再行推廣至英荷各屬或苛待華工或暴征身稅亦應次第設官申理容俟般島各島一律訪查之後由臣分別咨商駐英和法使臣酌度奏明辦理所有總領事繙譯隨員等官薪俸前經奏明請由中朝籌給本年六月十二日承准總理衙門咨開此次小呂宋新設領事薪俸經費

應由何項撥給應給若干由臣妥籌辦法等因臣體察所稟情形各該島甚願自籌力亦能辦將來小呂宋總領事派定後應在出使經費項下將第一年經費先行核給較爲得體並照總理衙門奏覆新加坡成案飭令該領事將歲收冊照各費報明抵還第二年後便可不費公帑餘者作爲造船公款稟候撥用其總領事等署中一切辦公雜用應准於所收冊照等費內動支開報毋庸另請公款一年後稟報核定數目其設領事之處就其餘款酌撥若干量設書院一所亦先從小呂宋辦起由臣捐資倡助並購置經書發給存儲令各該領事

紳董選擇流寓儒士以爲之師隨時爲華人子弟講授使其習聞聖人之教中國禮義彝倫之正則聰明志氣之用得以擴充而愈開水源木本之思益將深固而不解從此輾轉傳播凡有血氣未必無觀感之思查各埠入款以每年注册及進出口船牌之費最爲名正言順誠使事機順利不致別有阻礙屈計該處此兩項收入不少除抵支領事公費尙可逐漸積存一款以備購置護商兵船之用一切收撥章程應俟設官之後再行飭令核擬如所收册照船牌等費不敷開銷擬懇恩准由粵省勸諭各該埠商量力捐資獎以虛銜封典翎枝專

充領事經費永不提用各埠旺淡不等挹彼注茲必可  
敷用

硃批該衙門議奏欽此

續查未歷各埠片

光緒十三年十月二十四日

再上年奏派總兵銜副將王榮和鹽運使銜知府余瑞  
周歷南洋有名諸島往返程期約須八閱月所有月薪  
公費每月統共需銀一千三百八十兩請由粵海關歲  
撥出使經費項下就近劃給均經奏明在案現據該委  
員等稟稱自上年七月起程至本年七月初四日由新  
金山折回粵省止已逾期四月有餘所至各埠如日裏

柔佛庇釐市濱亞都律大金山叭拉辣旺加拉打必治  
活谷當九處皆原案未及備載而華民衆多商務緊要  
不得不順道一往以致往返稽時未能如期歲事先經  
稟准展期六箇月綜核支用不敷已多重洋未克隨時  
請領當由新金山折回現擬續請再往般烏西貢海防  
暹羅各處查看等情臣查王榮和等祇以遠隔重洋跋  
涉不辭勞瘁所查各埠情形甚爲詳細般烏一島地方  
廣濶距中華洋面不遠至暹羅西貢海防等處南洋近  
地華民極多尤應體訪明確自應將前奏未歷各埠仍  
由該委員等一律訪查以竟全局當經咨會粵海關監

督臣長有在於出使經費項下續撥六箇月經費銀八千二百八十兩發給該委員等收領以便進行

硃批該衙門知道欽此

力疾銷假籲懇陛見摺

光緒十三年十月二十五日

竊臣前因久病未痊疊疏乞罷於八月二十四日差弁賁回原摺奉硃批著再賞假兩箇月毋庸開缺欽此恩慈優容感悚交集當卽一面黽勉供職一面加意調治緣臣以極迂極鈍之才處兩廣至繁至難之地思力日趨於艱苦陰陽遂至於交傷近日籌辦諸事粗具規模現屆兩月假滿氣體之疲肝脾之證雖仍如前而神思



引三集 卷之三  
稍覺活潑夜寐稍覺定靜伏念臣病軀竊位無補時艱  
乃守官之疚責方深而大造之洪施無盡浮沉戀棧則  
有不安固求弛擔則又不敢但可支持自效亦何容再  
瀆宸聰當力疾銷假隨時醫調一應地方事件仍照常  
竭誠辦理惟臣自光緒十年閏五月來粵瞬逾三年遠  
離闕廷夢寐依戀早應奏請展覲祇以夏間卽經乞病  
未得上請今已銷假自應及時疏陳合無籲懇天恩准  
臣入都陛見俾抒瞻就之忱至兩省重大事務地方詳  
細情形亦得縷晰敷陳面聆聖訓庶幾欽承有自遵守  
奉行可免隕越無任懇切屏營之至如蒙恩允所有兩

廣總督篆務仰祈簡員署理俾臣得以交卸起程  
硃批毋庸來見欽此

開設書局刊布經籍摺

光緒十三年十月二十五日

竊惟經學昌明至我朝爲極盛道光年間前督臣阮元  
校刊皇清經解一千四百餘卷藏板學海堂旣已表章  
先正亦以鼓舞來學於是海內通經致用之士接踵奮  
興迨今六十餘年通人著述日出不窮或有藁草遺編  
家藏槧本當時未見近始流傳亟應續輯刊行以昭聖  
代文治之盛況學海堂爲當日創刊經解之所是粵省  
尤當力任此舉勉紹前規臣等海邦承乏深惟治源亟

宜殫敬教勸學之方以收經正民興之效此外史部子部集部諸書可以考鑑古今裨益經濟維持人心風俗者一併蒐羅刊播上年卽經臣之洞捐貲設局舉辦然必須籌有常款擇有定地方能經久現經臣等公同籌度卽將省城內舊機器局量加修葺以爲書局名曰廣雅書局臣之洞捐銀一萬兩臣大澂捐銀三千兩順德縣青雲文社捐銀一萬兩仁錫堂西商捐銀一萬兩省城惠濟倉紳士捐銀五千兩潮州府朱丙壽捐銀五千兩共銀四萬三千兩發商生息每年得息銀二千三百六十五兩又誠信堂敬忠堂商人每年捐銀五千兩共

七千三百六十五兩以充書局常年經費計款項尙不甚充如以後別有籌捐之款再當湊撥應用視經費之贏絀爲刊書之多寡檄飭兩廣鹽運司綜理局事博訪文學之士詳審校勘將來各書刊成當隨時刷印咨送國子監以備在監肄業者考覽之助

硃批該衙門知道欽此

建築牛山礮臺完竣摺

光緒十三年十月二十五日

竊查廣東省河東路北岸之牛山地方距省七十里其東八里曰波羅廟卽南海神廟所在由此登陸可達烏涌燕塘爲入省大道道光年間洋船係由此登陸其地

與沙路南北相對爲長洲之左臂魚珠之外屏其下海洲四段相接名曰沙口凡由虎門入口之船必經蓮花山下駛進四沙口方能上抵黃埔以達省城水陸均當衝要光緒十一年間飭委德弁周覽省防形勢僉謂此處必宜築造礮臺方不致令敵人由波羅一帶登陸襲我魚珠各臺營後路當飭記名總兵李先義督率副將吳元愷都司吳良儒相度形勢繪具圖說經臣之洞覆加核定就該山建築新式礮臺七座兵房暗道子藥房均依法配造礮路所向正扼四沙口咽喉若敵船將近可與沙路之礮犄角呼應即使敵船橫過又可與魚珠

之礮首尾夾攻安設阿模士莊十二噸新式鋼礮四尊  
克虜伯二十一生特三十五倍口徑新式鋼礮三尊各  
礮係先後電託出使大臣會紀澤許景澄分向英德兩  
廠訂購臺工於本年二月間告竣各礮自前年六月至  
今年十月陸續到齊安放妥貼臣等親往驗視臺工演  
放礮位均屬合法得用所費亦較從前所建礮臺爲省  
所有礮價臺工地價飭局彙案造銷現派記名總兵李  
先義督同副將吳元愷率營駐守操練以固省河藩籬  
硃批該衙門知道欽此

請表揚前運司洪汝奎摺

光緒十三年十一月初  
三日

竊照已革兩淮鹽運使洪汝奎前經臣之洞以廣東防務善後需才孔殷將該革員奏調及立身居官大端分晰上陳欽奉諭旨發往廣東差遣委用先是該革員卧病居家臣鴻章深念其才品不凡閒廢可惜屢次致書約赴天津處之賓幕以資遇事商權該革員以疾辭迨奉詔起用感激聖恩力疾航海南來於上年冬間抵粵經臣之洞委辦海防善後局虛衷諮訪該革員探討利弊不遺餘力議論皆中肯綮以病軀積勞於十二月內歿於粵省差次忠忱徒切未竟厥施臣等同深痛惜茲據江蘇江甯府紳士國子監學正銜舉人汪士鐸等

十二人江蘇揚州府紳士按察使銜刑署山東兗沂曹  
濟道候補道姚光鼎等十二人先後聯名呈稱該革員  
洪汝奎原籍安徽寄籍湖北由舉人考取教習留京當  
差師事故大學士倭仁故侍郎呂賢基吳廷棟勉爲經  
世有用之學考德問業以躬行實踐爲主日有記錄嗣  
以粵匪之亂迭經故湖北巡撫胡林翼故大學士曾國  
藩辟參戎幕贊畫軍謀多所裨助洎自江甯由教習知  
縣洊保道員先後委辦善後營務保甲各局事宜時大  
難甫平城中房產地基爲豪強侵占該革員躬率履勘  
扶弱鋤強疲氓復業同治五年臣鴻章署任兩江諭知



該革員廉正精核長於理財檄委總理江甯糧臺該革員設法句稽不避嫌怨力顧要需出納逾數千萬裁禁濫支節存鉅款後來興修水利籌辦海防並資其用而新疆巡撫劉錦棠所統老湘營一軍始終籌濟軍餉凡七百餘萬兩用收廓清西域之功尤爲有裨時局歷任兩江督臣均傾心委任沈葆楨尤所器異連章論薦渥蒙厚恩遂由候補道員簡擢兩廣鹽運使旋調任兩淮鹽運使該革員自筦淮綱力節浮冗甄拔沉滯設經國堂以課僚屬凡委差委缺胥視其殿最以爲衡裁適逢海嘯奇災淮南各場被禍最烈該革員發款籌捐盡心

賑撫沿海竈丁數百萬胥慶更生地方諸務銳意振興  
未及期年百廢具舉旋因案罷職遣戍去任之日父老  
遮留追送不絕於道考其得罪之由究由於嫉惡過嚴  
之故業蒙恩命賜環特旨錄用茲以力疾馳驅於廣東  
差次病故江淮士民感念遺澤誼思不已查原任揚州  
府知府何金壽前經故大學士左宗棠奏奉上諭左宗  
棠奏已故知府遺愛在民懇恩宣付史館一摺已故揚  
州府知府何金壽講求吏治輿論翕服實屬遺愛在民  
該故員生平政績著宣付史館立傳以彰循吏等因欽  
此今洪汝奎前任兩淮運司清節惠政實屬後先濟美

相應援案呈請具奏籲懇聖恩將該革員事蹟宣付國史館列入循吏傳並可否懇恩開復原官以勵循良等語該紳等先後赴臣國荃臣鴻章衙門呈遞臣之洞臣大澂復准安徽撫臣陳彝咨送揚州府紳士姚光鼐等公呈懇祈具奏請予表揚前來臣等伏查該革員洪汝奎饋軍戡亂具有前勞善政宜民尙留遺愛已蒙恩旨發粵委用是其前愆可原人才可用早在宸鑒之中茲據該紳等臚列事實請予奏懇恩施查已革貴州巡撫林肇元在籍病故前經雲貴督臣岑毓英奏准開復革職處分欽奉諭旨嗣後不得援以爲例自應欽遵辦理

惟該紳等係兼爲洪汝奎懇恩列入循吏傳臣等未敢  
壅於上聞且洪汝奎已奉特旨起用究與廢棄之員有  
別其應如何加恩之處出自聖裁臣等未敢擅擬再此  
摺係臣鴻章臣國荃因洪汝奎係在粵差委病故咨送  
公呈函商臣之洞等由粵會銜具奏

硃批洪汝奎獲咎較重且係未經開復人員所請均毋  
庸議欽此

續裁營勇摺

光緒十三年十一月初三日

竊查瓊郡現已肅清省外各路匪鄉辦理亦漸就緒所  
有各勇營自應隨時酌量裁撤歸併填紮以節餉需綜

計提督馮子材所部萃軍暨全字兩營共裁去十七底營四千二百五十名尙存五底營一千二百五十名親軍一百三十名水師提督方耀所部潮普勇裁去一營五百名尙存五整營勇二千五百名親軍二百名署陸路提督鄭紹忠所部安勇裁去一營五百名尙存五整營勇二千五百名親軍一百名潮州鎮總兵鄧安邦所部各項巡勇共裁去三百五十五名尙存巡勇六百四十名駐守礮臺銳勇一底營二百五十名廣西補用道方長華所部瓊軍八底營除撥歸署高廉道王之春前赴欽防兩底營撥歸雷瓊道朱采四底營外實裁去方

長華所部勇兩底營五百名調署碣石鎮總兵劉永福所部福軍裁去三底營六百名尙存兩底營四百名親軍一百名以上所裁各營均飭截至六月底止署高廉道王之春經撥帶兩底營裁去一營二百五十名尙存勇二百五十名親軍一百名北海鎮總兵王孝祺所部勤軍裁去一營二百五十名尙存勇二百五十名親軍一百名本年閏四月內於省城奏設緝務局原募勇丁四百八十名又守備羅祺原帶巡防沙面靖衛營勇三百名又知縣李家焯原帶河南緝捕一百名三項共八百八十名裁去三百八十名尙存五百名併爲緝務營

歸緝務局管帶都司司徒驥於上年十一月查辦恩平開平新甯鶴山等處積匪原募勇丁二百名全裁經理福軍營務同知孫鴻勳除所帶新福軍兩營全數撥歸雷瓊道朱采外實裁親兵一百名知州田明曜原帶西關緝捕勇一百名全裁以上所裁各營勇皆於十月以前陸續裁撤計共裁勇丁七千九百八十五名又署前山同知蕭丙堃於九月內新募巡緝勇丁二百名並添配拖船兩號輪船一號收除併計實裁減勇丁七千七百八十五名仍酌量地方遠近加給口糧其有籍隸外省者加給一箇月餉銀並分雇船隻派員押送同籍沿

途均屬安謐此外由營務處委員查遣湘皖廣西等省  
游勇十起共一千四百七十四名亦經分別內外江海  
雇船給資妥爲押送  
硃批該部知道欽此

改定瓊州營制摺

光緒十三年十一月初九日

竊照瓊州一島爲海疆第一要衝孤峙大洋逼近越境  
內綏黎客外籌海防在在胥資兵力而勇營需餉浩繁  
殊非經久之計迭經與督辦欽廉防務提督馮子材水  
師提督方耀署陸路提督鄭紹忠暨瓊州鎮道往復詢  
商臣等督飭司道參考羣言覆加酌核惟有就瓊州原



有之制兵酌設練軍加足練餉一洗綠營積弊庶可化  
虛糜而爲實用查瓊州鎮標裁存額兵四千零九十九  
名擬就瓊州鎮標左右兩營崖州協萬州營儋州營海  
口營海安營共七營每營抽練陸軍一底營計二百五  
十名書識號令親兵紅藍旗俱在其內七底營共一千  
七百五十名先將馬兵戰兵儘數歸練不敷之數以守  
兵補足又瓊州水陸額設崖州儋州海口海安等營拖  
船十號現擬先行整頓七號分撥崖州二號儋州二號  
海口二號海安一號共配撥練軍二百五十名連前陸  
軍共二千名陸軍不論馬步戰守每名均給月餉實銀

三兩每練軍十名設副長一名月餉三兩三錢拖船正  
兵月餉三兩每號設正副舵工各一名正舵工每名月  
餉六兩副舵工每名四兩五錢陸軍每營五哨中哨營  
官自帶拖船每一號爲一哨陸軍哨官二十八員拖船  
哨官七員水陸哨官均於本營千把外委內選充不拘  
實缺候補每員月給薪水銀九兩所有薪糧均不扣建  
營官七員卽以本營現任副參遊等官兼充無論官階  
大小每員月支辦公費銀一百兩如遇有剿捕擇要屯  
防爲日甚久管帶之將官未便終年在外應每營各設  
幫帶一員以便更番而資兼顧卽於本營現任都守內

酌派兼充幫帶官七員每員月給夫馬費十五兩以瓊  
州鎮總兵爲號統領自支辦公費銀二百兩統計練餉  
薪水公費每年共需銀八千八百四十八兩各營除抽  
練之外尙應存守兵二千零九十九名以充看管城門  
局庫護解人犯各項例差及勻撥各處緊要塘汛以存  
舊制此抽撥練軍酌定練餉之章程也查此項抽練之  
馬步戰守各兵原有底餉銀三萬三千餘兩又原有本  
色糧米七千二百石每石按照部章六營均折銀七錢  
海安營折銀五錢共銀五千餘兩又馬兵原有馬料米  
折銀五百六十餘兩一律由藩庫及高廉雷瓊各道分

別扣出移交海防善後局湊撥練餉既歸畫一旦免延  
欠共抵銀三萬八千五百餘兩尙不敷支銀五萬餘兩  
擬卽就瓊州現駐防勇十底營中酌裁五底營每年計  
裁銀八萬一千餘兩除撥補此項不敷之練餉外每年  
計可節省銀三萬零二百餘兩遇閏之年應加月餉薪  
費共七千三百七十八兩有奇除原有餉米外較之閏  
年勇餉所省仍多俟勇營報裁之日卽爲練軍起支之  
時其挑剩之守兵二千餘名應支餉米仍照舊章此酌  
撥勇營撥補練餉之辦法也至抽練之兵悉按勇營規  
制一律挑選精壯足額臨時派委大員點驗向來虛伍

攤扣散渙驕惰等積習嚴行禁革其有革退事故卽由  
練營募補不得沿襲缺底頂充之弊革退者將積欠餉  
米清給本人已故者清給家屬其底營之本管都守千  
把等官不得干預但不得以別省之人充補應專募廣  
東本省之人毋庸拘定瓊州一府餉項每月支發一次  
陸軍七底營務令一營合紮一處朝夕操練不准散處  
城市兼習工商海風猛烈支帳難以耐久均令搭蓋營  
房居住卽以每年應領帳棚經費抵作工料修理之用  
所有軍器仍由軍需局照章核發拖船責令住船勤操  
巡洋會哨練習風濤沙綫水路均由瓊州鎮督率考校

認真奉行至支發練餉責成雷瓊道切實稽查按季稟報如有缺扣稟明查參此挑練成軍屯紮操練發餉稽查之章程也以上各條略仿直隸練軍章程而月費薪水及火夫長夫等項撙節甚多至統領管帶各鎮將雖係有缺人員而廉俸無多又經減成萬萬不敷用度以致攤扣百出難期整頓況海外瘴鄉尤須優加體恤方能專心盡力且本營各有將官統帶之總兵不能照別省章程自帶一營別無薪公可資津補自宜一律籌給以資辦公而免流弊由海防善後局司道核議會詳請奏前來臣等查瓊防勇營分布黎峒及郡城海口地方

巡察鎮壓爲數不能過單若非酌設練軍則勇營斷難  
議裁而綠營無憑整頓原有之底餉銀米徒滋虛耗今  
加餉抽練挹彼注此一轉移間營兵可爲有用勇餉亦  
多節省似於瓊防不無裨益

硃批該部議奏欽此

瓊州伐木免稅墾田給獎片

光緒十三年十一月初九日

再瓊州黎山開通山內林木茂美田土饒沃現在籌辦  
善後開濬利源尤以伐木墾田爲當務之急前經奏明  
招商伐木略分官辦商辦二法官辦亦須轉售商人仍  
應廣爲招徠查商貨向以木料爲大宗瓊郡素產木材

而歷年出口本稅收數甚屬幾微良由黎山深阻煙戶  
甚稀人工運脚無一不昂商販不前坐棄大利茲當黎  
山初開欲興商務必須寬籌辦法減輕成本以來商賈  
而惠黎歧現擬凡由瓊州出口木料三年之內所有關  
稅釐金暫行寬免官山則指定地方限以四至給予護  
照開采黎產則與黎人公平價買三年之後再行察看  
情形量徵釐稅若能開通老山木料層出不窮商賈雲  
集徵權自形暢旺埠頭日見繁盛邊民生計利賴良多  
至開墾田畝緩徵薄賦亦經奏明在案惟近來民人入  
山覓地多係零星認墾不成片段田土之利本微又屬



瘴鄉若欲廣集商民大開阡陌必須格外鼓勵始足歆  
動羣情現擬出示曉諭商民有能集資前往雇募黎歧  
開墾一人名下認墾至千畝及萬畝以上三年成熟者  
酌量給以千把外委等武職以示獎勵而資鈴束庶商  
民聞風興起踴躍赴功田土可期日闢

硃批該部議奏欽此

瓊州開鑛暫免稅釐片

光緒十三年十一月二十四日

再瓊州府昌化縣境內大豔山府志名峻靈山多產銅  
及石綠故亦名爲石綠山前經香山職員張廷鈞招集  
股分購備機器前往開采業經奏明在案查石綠爲銅

苗所結下有銅鑛精華上溢融爲石綠每石綠百斤佳者可鍊銅十餘斤至二十斤不等其不能鍊銅者賣作顏料茲查大豔山地近黎境道路旣遠瘴癘尤重出產雖佳工費甚昂現在黎境甫通鑛務創始儻無確利可圖必致觀望自沮惟有減輕成本始足以徠商販而惠民黎茲擬將昌化石綠及銅斤凡販運出瓊州海口者自光緒十四年起三年之內所有山稅及關稅釐金概行暫免俟開采行銷大旺再將稅釐酌量抽收其餘瓊屬五金等鑛如有集資開辦亦卽一律辦理暫免稅釐庶幾通商惠工地利興而島民裕矣

硃批戶部知道欽此

張文襄公全集卷二十三終

紹興孫家棟校

張文襄公全集卷二十四

奏議二十四

巡視海口摺

光緒十三年十一月二十七日

竊惟廣東帶海爲疆三洋海面均以粵爲首衝粵省緊要海口廣州六門而外欽廉瓊潮最爲扼重省防虎門一帶水陸各營壘迭經臣會同歷任撫臣巡閱多次惟省外尙未及周歷目前兩粵吏治軍政大端粗舉臣雖以孱軀力疾未敢偷安茲定於十二月初二日乘輪出省隨帶測繪員生由虎門放洋先巡瓊州海口次至廉州北海次歷欽州洋面次至潮州汕頭周覽形勢審度

築臺設戍處所測量兵輪出入要隘兼以詢訪風土民情考核吏事營伍回省日徧閱廣屬五門內外河海港澳及西海水道計往返約需旬餘理合恭摺具報伏祈聖鑒

硃批知道了欽此

密陳鄭紹忠久任有益片

光緒十三年十一月二十七日

再署廣東陸路提督記名提督前潮州鎮總兵鄭紹忠自光緒十年辦理海防奏署陸路提督以來威信卓然軍民愛戴近年奏派查辦廣肇韶等郡匪鄉已著成效前丁母憂經臣奏明廣東各鎮如該署提督才器堪膺

斯任者實難其人懇請暫留提督署任奉旨允准在案  
茲恭閱邸鈔本年十一月初八日奉上諭御史金壽松  
奏請飭唐仁廉赴廣東提督本任等語提鎮大員留帶  
他省勇營事所常有朝廷慎重防務具有權衡唐仁廉  
簡授提督後如果現在防營無須該提督管帶李鴻章  
定行具奏或廣東本任緊要必須唐仁廉赴任張之洞  
亦必據實上陳何待言官陳請等因欽此仰見 聖主  
眷顧巖疆任官惟取其宜聽言必求其是欽服莫名伏  
查廣東陸路提督一缺轄境寥闊民俗獷悍自非威望  
素孚情形熟習措施鮮能應手該署提督鄭紹忠功績

才望與水師提督方耀相埒而質樸清廉厚重謙謹所部安勇紀律嚴明秋毫無犯士民愛敬尤異常情前年大修廣屬三水清遠等處圍基該署提督親身勸督工程隄防永固目前查辦匪鄉於盜匪之踪跡弁兵之利弊紳團之情僞無不周悉巨匪凶黨以次殲除輕重緩急悉合機宜且陸路各營將弁大半皆其舊部隨在稽察整頓湔除綠營積習均能實事求是如能久於其任俾得盡其所長裨益營務造福地方實非淺鮮朝廷於專閫大員遷擢調遣自有權衡非臣下所敢輕議茲因明詔所及謹將該署提督鄭紹忠署篆得力久任有益

之處據實附片密陳以備裁擇

硃批知道了欽此

添設各路電綫摺

光緒十三年十一月二十七日

竊照兩廣電綫前已造至梧州並分達南甯龍州等處  
惟自梧州至桂林省城相距七百餘里尙未設有電綫  
嗣因西省設立防營兼有勘界商務事宜均關緊要文  
檄往來甚遲若非設立官報不足以通消息而速事機  
當於上年十一月經臣之洞檄委電報局委員候選直  
隸州知州沈嵩齡督飭員弁由梧州開工歷昭平平樂  
陽朔至桂林省城共造綫路六百四十五里一路俱屬



高山峻嶺幸趨工迅速於本年四月十五日竣工卽在桂林設立分局一所復以綫路過長巡護難周於昭平添設報房一所此由廣西梧州展至桂林省城電綫之情形也又雷瓊欽廉前經一律展設電綫節節靈通惟欽州至東興仍須由驛投遞嗣因傳遞勘界官報所關甚鉅當於去年十月間飭委員沈嵩齡分飭趕造由欽州歷防城茅嶺抵東興計綫路三百二十里因茅嶺河面甚闊另用鋼綫飛渡以省水綫之費於上年十二月初十日竣工卽在東興設立子局一所此由欽州展至東興電綫之情形也又官軍赴瓊勦辦客黎各匪飛機

往來急需遞報仍飭委員沈嵩齡於上年九月間督飭興造自海口開工由定安至萬州復由定安至屯昌而抵嶺門並經番響入黎峒以達毛西村計綫路七百五十里中隔大河均用長木飛綫另由番響經打運及毛站凡陽至萬充計綫路一百八十里又由儋州至昌化以備礦務通報計綫路二百零六里又由儋州至那大經南豐進黎峒以達番崙而抵毛西村與東路接合計綫路三百六十五里其間隨營通電由萬州至陵水由陵水至崖州復由澄儋進抵和舍那大一路共計常綫軍綫七百三十五里除拆卸常綫軍綫三百三十五里

外實造存常綫軍綫一千九百零一里均於本年閏四月八月間陸續竣工在崖州設立子局一所在屯昌萬州陵水嶺門那大儋州昌化凡陽等處設立報房八所現擬將嶺門報房移設番響以便分綫此由瓊州海口展至黎峒各處電綫之情形也又據署高廉道王之春稟稱高廉控制兩郡現在北海通商欽邊籌防事機動關緊要當卽飭委沈嵩齡自岸步設機厯石城化州而抵高州計綫路二百四十里於本年十一月初四日竣工卽在高州設立子局一所並將雷州子局移設岸步仍在雷州設一報房此由岸步展至高州電綫之情形

也又光緒十一年間准雲貴督臣岑毓英咨奏請興辦  
電綫欽奉上諭著照所請由廣西南甯接設電綫直達  
雲南其應如何擇地安綫之處並著派員前往查勘妥  
爲籌畫奏明辦理欽此等因其時因綫路設立未周費  
用較鉅再三籌議無從辦理嗣後鄂川入滇直達蒙自  
一路電綫業經奉旨建造查廣西南界接壤滇邊桂滇  
皆南鄰越南滇境則西接緬甸若僅恃由鄂入滇一綫  
傳達電音設有雷雨拆斷綫桿阻滯堪虞且遇有軍務  
之時由滇川滬鄂展轉至粵恐有交會壅滯之患臣等  
因將廣西南甯至滇境剝隘一段先行由粵勘造一面

與雲貴督臣往返籌商旋准雲貴督臣電復自剝隘至  
蒙自地方卽由粵購料接造並籌款添設騰越一綫則  
滇中防務絕無隔閡之虞等語現由廣西南甯府經百  
色廳接至雲南剝隘約計綫路八百餘里於十二月開  
工明年二月初旬計可告竣卽在百色剝隘二處設立  
子局各一所其剝蒙一綫俟剝隘工竣後由滇省委員  
接造此後滇粵氣通兩綫並行邊防大有裨益此由南  
甯展至剝隘並滇省擬接通電綫之情形也以上各路  
電綫經費均由海防善後局籌款支給飭令該委員格  
外撙節不得稍事虛糜俟一律竣工卽將承造各處電

綫地名里數彙案核實報銷茲據廣東善後局司道轉  
據電報局候選直隸州知州沈嵩齡具詳請奏前來臣  
等查核以上各路電綫縱橫三千九百餘里均能迅速  
竣工核實撙節得應急需且瓊州內地山高林密瘴癘  
薰蒸水土惡劣在各軍攻勦喫緊之時萬分危險該員  
弁工勇人等懸軍深入毫無退避以致瘴故者至六十  
餘人之多航海登山蒙瘴冒險實爲向來所未有現在  
南甯至剝隘一路該處山嶺崎嶇人煙稀少逆水轉運  
將及千里其艱險亦復相同殊爲備極勞瘁可否俟工  
竣後由臣等援照上屆成案擇尤保獎出自逾格鴻慈

謹會同廣西撫臣李秉衡恭摺具奏伏祈聖鑒

硃批著照所請該衙門知道欽此

恭報巡海旋省并查閱圍隄情形摺

光緒十四年正月初五日

竊臣於上年十二月初二日乘輪出巡各海口兼巡五門河道當經奏報在案隨即率同道員王之春及熟習礮臺各將弁等乘坐新造廣甲兵輪出海藉以考驗該輪行駛遲速於初五日南行抵瓊州海口港登岸閱視海口所城外舊臺及府城情形併周歷府西之西場金牛嶺水英等處詳加測量與該鎮道等籌商撫輯黎客及善後招商建築馬頭事宜初七日西北行抵廉州屬

之北海鎮登岸查閱冠頭嶺地角山南灣等處形勢初  
八日西行抵欽州屬之白龍尾泊舟珍珠墩登岸查閱  
該島及沿邊沿海諸沙形勢與該鎮道府州等籌度設  
官安汛諸事宜江平嘉隆八莊等處紳團遠來迎謁當  
經各加拊循犒賞該紳團等喜於內附無不感頌皇仁  
歡忭鼓舞初十日東南行抵北岸雷州府屬之海安所  
登岸查閱博漲白沙各舊臺形勢十四日經由香港東  
抵汕頭連日登岸查閱崎嶇大小兩礮臺暨馬嶼馬仔  
澳頭等處口門形勢適潮州鎮道府等稟報海陽縣大  
隄工竣稟請委驗當卽由汕抵府城查閱該隄工程還



汕後復至南岸查閱蘇安山礮臺十九日還至香港二十至二十五等日換坐中等兵輪由八塘尾觀音沙周歷蕉門橫門磨刀門崖門惟虎跳門上下口均有沙淺未能駛過遂泝西江而上直抵肇慶府城沿途查閱圍基各工西抵肇慶府上之五榕峽口率同該道府縣等查閱桂林景福羅秀等圍沿途查看甘竹灘陳頭石壁等處河道於二十六日旋省大率瓊州海口地勢平行淺灘過寬泊輪處所尋常礮力難及設防最爲不易廉州北海雖有冠頭天馬諸嶺而迤東平沙皆可登岸亦須礮臺礮隊相輔爲用始克有濟海安舊臺不適於用

尙須另爲布置汕頭口門最緊量築新臺易於得力五  
門內扼要之區以觀音沙仰船海潭洲山豬頭山竹洲  
頭等處爲要綜計內外各口應行籌辦各事宜容俟分  
案奏陳其潮州海陽縣隄工地廣工鉅一律坦平堅實  
足爲郡城保障該隄係民捐民辦已集資二十餘萬兩  
間有小鄉力絀未能補苴完密處所勢難再爲題捐當  
飭該道府於潮州紳富捐尾數內提銀五千兩以助民  
力所不逮其西江各圍及道經之北江大路圍尙屬完  
固惟西江之羅秀圍地衝村貧關係高明一縣利害上  
年新築外隄尙嫌卑薄必須加築石隄當卽督飭肇羅

道孔憲穀督同紳董估計工費刻日籌款趕修以防春漲工成後專案奏報

硃批知道了欽此

請於嘉應州城建左宗棠專祠摺

光緒十四年正月初十日

竊照原任東閣大學士左宗棠前於光緒十一年奉命督辦福建軍務力疾視師盡瘁報國歿於福州軍次欽奉恩旨優卹特謚文襄入祀京師昭忠祠賢良祠並於湖南原籍及立功省分建立專祠仰惟聖朝篤念盡臣節終之典報祀之恩至優極渥凡有血氣欽感同深茲據廣東嘉應直隸州紳士知府銜陝西補用直隸州知

州張其飭率同閩州紳耆呈稱竊惟已故大學士左宗棠樞輔重臣勛庸懋著勦平髮捻底定回疆功在旂常無煩贅述而紳等則有不容已於言者當同治四年髮逆僞康王汪海洋一股由江西定南竄入廣東攻據鎮平經閩軍邀擊江西去路已斷該逆遂由連平繞越和平興甯各境進陷嘉應維時前閩浙總督左宗棠旣奉命節制江西福建廣東三省各軍策賊東西流走無定利於困而不利於攻遂定長圍坐困之計自率大軍由漳州進駐廣東大埔下令先由東西南三面滾營進紮江閩粵諸軍十餘壁各有分地水陸環進以乘賊敝汪

逆百計衝突迄不得逞遽率悍黨數萬猛撲東南方江  
閩各營官軍并力夾擊大敗賊軍槍斃汪逆餘眾仍推  
僞偕王譚體元及胡瞎子爲首負嵎死拒適故提督鮑  
超一軍入粵會勦行抵州西相公亭累戰皆捷左宗棠  
卽飭州南一面粵軍迤紮而東閩軍迤紮而西長圍一  
合飛走皆窮擒斬三萬餘人受降五萬餘人譚胡二逆  
先後殲斃全股盪平克復嘉應州城俾山陬海澨之民  
出水火而登衽席迄今二十餘年父老追思猶爲感頌  
現距該故大學士歿已二載閩浙陝甘各省均已遵旨  
奏請建祠而嘉應一州爲積年逋寇殄滅之地大功於

此告竣若不請建專祠何以慰謳思而彰崇報爲此聯  
名呈懇據情陳奏等情由署嘉應直隸州知州金桂馨  
具詳前來臣等查髮逆自金陵敗竄之後餘孽以汪海  
洋爲最悍擁衆二十餘萬由江閩窺粵所過摧陷盤踞  
嘉應州城粵省兵單僅敷扼守賴故大學士左宗棠督  
師入境合圍蹙賊聚而殲旃得截橫流而免滋蔓論其  
戡定之功關係廣東全省茲該紳等呈請爲該故大學  
士建立專祠眾議僉同羣情允協相應據情籲懇天恩  
准於嘉應州城內地方建立已故大學士左宗棠專祠  
列入祠典地方官春秋致祭以垂久遠而順輿情謹合

詞具陳伏祈聖鑒

硃批著照所請禮部知道欽此

轟開府江險灘片

光緒十四年正月初十日

再廣西水道自桂林至梧州名曰府江會灘樂恭荔諸水灘險石多最爲舟楫之患前明萬厯年間廣西巡撫蔡應科設法疏鑿數年之久未能盡平嗣後官商人等雖亦隨時修治獲效甚難臣前查悉西省繕路廢壞灘瀨險絕光緒十二年内籌發款項並江蘇協賑紳士嚴作霖等捐項會同護理廣西撫臣李秉衡飭委總兵馬進祥桂林府同知趙慶蕃永福縣知縣任玉森等將平

樂昭平一帶山路先行修理當將籌辦情形奏明在案嗣該員等因尙有餘款復將平樂至省緯路一併接修完善並鏟鑿險灘五處惟各灘僅能略去水面亂石其水底石根堅牢奔湍漩狀非斧鑿所能施因復派委知縣陳瀛藻縣丞張煥斗攜帶機器炸藥及工匠人等前赴各灘以機器鑿石成孔泐水安放炸藥以電綫轟發凡有險要惡石連根炸碎自光緒十三年二月起至四月漲發暫停計開將軍灘木碌秀才犁灘三門柳木龍口險害上下仰威鎮飾箕象棋黃牛小背等灘一十有四迨至十月仍飭該委員復行開辦維時冬乾水涸險



石盡出除前開各灘擇險再加轟除外至年底工竣另  
又開下古欖上古欖耙灘木夾鎖匙強灘面灘小神唐  
調馬灘下延亭金雞大龍大結廖家橫灘黑山脚韭菜  
龍鬚五大連假險窖等灘二十有一此外各灘尙平無  
須再事轟炸綜計兩次由蒼梧以迄陽朔約一百餘里  
共開險灘三十五處商民往來莫不稱便據該委員等  
繪具圖說稟報前來臣伏查桂林府江灘石林立有礙  
舟行向爲商旅之患此次施放炸藥化險爲平從此利  
涉同占似於商情民命均有裨益所需經費除電綫炸  
藥機器外經飭東善後局於公用閒款籌發銀四千餘

兩所有開竣灘河情形謹會同廣西撫臣沈秉成附片  
具陳伏祈聖鑒

硃批知道了欽此

出省查勘圍基及緝捕河道情形片

光緒十四年三月二十八日

再臣之洞因北江猛漲親赴北江各縣查勘圍基前於  
會奏分籌防護水災摺內陳明在案當於三月十五日  
乘小輪船泝北江而上過清遠峽至白鶴汎連日天宇  
開霽查看沿岸漲痕詢問上游一帶水已消退民田人  
口幸無損傷卽轉輪下峽會同署陸路提督鄭紹忠於  
沿江各大圍詳加查閱所有清遠縣屬之倒水灣正江

口山塘石角等圍三水縣屬之長洲清塘榕塞東海口等圍壩均屬完固間有墊陷滲漏者均經該提督督同各該縣官紳相機修築其支河各圍及四會花縣英德佛岡并西江所經之高要高明南海腹地各圍分遣委員前往查覆俱獲無虞遂駛過西江下游查勘三水縣屬大路圍水竇工程高要縣屬羅秀圍石隄工程並南海縣屬之西江沿岸各圍羅秀石隄業經興工當經諄飭該管肇陽羅道孔憲穀督率印委紳董趕築歲事沿途順查緝捕河道過新會縣屬之江門燕子塔熊海西抵新甯縣屬之新昌荻海周厯香山縣屬之梅涌虎跳

門疊石海白花頭小欖鸚哥嘴順德縣屬之木頭海板  
沙尾李家沙番禺縣屬之蠔濠口紫泥關沙灣八塘尾  
獅頭海大欖口東抵東莞縣屬之新塘河等處以上皆  
海汊衝要河道廣闊處所查看新設巡緝輪扒各船稽  
察文武員弁勤惰於二十一日旋省查本年春漲西北  
兩江各圍幸資捍衛臣等現飭擇其衝要卑薄處所趕  
緊修補完固豫防夏秋盛漲其緊要工程民力實在瘠  
苦者並酌量籌發官款以爲倡率俾令迅速集捐修築  
早日成功以收曲突徙薪之益至東江上游向無基圍  
下游東莞縣屬之福隆司馬兩圍被水甚重圍大田多

潮州府屬海陽澄海兩縣大隄地段廣長關繫甚鉅此次坍卸雖少該處秋漲素盛尤宜慎防應卽一體酌發官款分飭潮州鎮總兵鄧安邦署潮州府知府方功惠署潮州鎮中軍遊擊方沿分別會同各該縣督勸紳董集捐修復

硃批知道了欽此

加增閩厰協造兵輪經費并聲明辦法摺

光緒十四年五月

月初八日

竊查臣等上年具奏廣東分年捐款由閩厰協造鐵脅穹甲快船四艘共協銀三十六萬兩又協造中號兵輪

四艘協銀一十二萬兩聲明請免報銷等因一摺欽奉  
硃批該衙門知道欽此嗣准戶部咨議覆船政大臣裴  
蔭森奏請動用工料仍歸船政報銷一摺以所造兵輪  
係由捐辦與南洋之動支官款者不同將來應由廣東  
彙報該大臣所請由廠報銷之處應毋庸議又於裴蔭  
森奏請援照開濟快船成案動支官款仍由船政報銷  
摺內議以此項兵輪係粵省官商捐辦與開濟快船事  
由官辦者不同所請動支閩省官款及代爲報銷之處  
礙難核准各等因會同海軍衙門奏奉懿旨依議欽此  
先後咨行到粵並准船政大臣裴蔭森咨會籌辦前來

伏查兩次部咨皆議駁閩廠所請報銷而今照粵省原擬辦法夫粵省原議本謂粵濟閩費閩濟粵工不論需費若干惟以大船每艘協銀九萬中船每艘協銀三萬爲率緣訂議之初工料皆從約估未能絲絲入扣且謂公款公用尤不必過較錙銖其實各船需用繁鉅斷非數萬之資所能造成若如部議不准閩支官款則不敷之物料將自何出不准閩爲報銷似常年之工資亦歸粵認在閩廠有難行之勢卽粵船有中輟之虞有不得不縷晰上陳於 聖主之前者臣等溯議辦此事之初粵省並無可籌之款徒以官紳商民忠忱激發報效銀八

十萬兩以三年之力成十艘之用而有船不可無礮除  
備購礮價二十餘萬兩並粵省船局自造廣戊廣已兩  
小輪工價五萬數千兩外以之再製大中八輪實有不  
敷適值閩廠爲南洋代造三船告竣器全工暇遂商爲  
協造之舉誠以閩廠工匠參養有常不令造船便成坐  
食且虞荒情而閩廠造船經費又苦難支是以臣等前  
奏有粵濟閩經費之不足閩助粵工力所有餘之語此  
蓋兩省均有利益資閩廠之成局成粵防之利器非欲  
使閩廠爲粵之故驟然多請撥支數十萬也粵省原奏  
所謂不動庫款者謂粵協數十萬全出捐資不動粵省



庫款閩廠就原有經費協造亦不另撥閩省庫款也閩省原奏所謂船政自行報銷者乃就閩廠原有之常年經費中分晰造報協造粵省某船用過工費若干其應銷之數自當循照閩省舊章辦理如部駁所云則是經費工力皆須粵認是直粵省雇賃閩廠閩工而爲之耳何名爲協造乎與臣等原奏既有未符與他省協造成案亦不畫一夫南洋前製快船動用官款閩廠且爲代造助以工料之不足今粵省兵輪出自民捐實歸官用將來造成尙須遵照海軍衙門奏定章程駛赴津沽聽候查驗與民捐民用者迥然不同雖非全數報效較之

南洋究可省官款一半而轉不令協助工費臣等反覆  
思之未解其理江粵同爲海疆戶部斷無厚於江而苛  
於粵之理竊揆部臣之意似係誤會閩奏疑爲閩廠將  
因此於年例外多支多銷若干萬以致嚴切駁阻查粵  
省於歷年悉索之餘能捐船礮費八十萬可謂急公好  
義竭盡緜力而船政大臣於作輟兩難之際思爲協造  
之法其支持籌畫亦實具見苦心茲粵價已匯閩料已  
買而閩廠奉駁欲停辦而不能欲續捐而無力不但失  
此次商民之心且以阻後來勸捐之路則是反不如不  
捐之爲愈也惟旣屢經部駁且又謂協費未能及半自

不得不勉籌辦法以冀兩全臣等與裴蔭森往復函商切實估計廣甲一艘約計工料銀二十二萬兩乙丙丁三船每艘約二十萬兩庚辛壬癸四艘每艘約六萬兩合計約共需工費銀一百零六萬兩以協濟各半計之粵省應協助五十三萬兩除原議協銀四十八萬兩外擬再統行協助銀五萬兩湊足半價五十三萬兩其餘一半由閩支銷庶閩廠不致掣肘粵船得以告成與兩省原奏之案亦相符合然粵省於捐定鉅資之外復增數萬之多實已萬分爲難矣竊念國家設立船政原爲海疆各省造船而設經費有專款員匠有常額自造與

協造本無區別協粵與協江更無差等不過爲粵省多  
造一船卽爲別省少造一船要之於閩厥經費並無出  
入合無仰懇天恩俯念此舉有益粵防無損閩款敕部  
立案准照臣等所議辦理仍由船政自行造報以清款  
目至於各船礮位現擬改設耳臺添配一尊並須較大  
者原備礮價二十餘萬仍有不敷尙須勉籌集捐彌補  
以成斯舉而裨海防  
硃批該衙門知道欽此

舊疾復發懇恩賞假摺

光緒十四年五月十五日

竊臣以疾軀庸材渥荷高厚之恩自上年十月力疾銷

假假後極思勉策朽鈍求盡職守稍答涓埃未敢稍存  
畏難偷安之念乃本年春間感受濕熱觸發肝鬱舊證  
左脅作痛醫者誤用猛劑正犯醫經所忌攻伐無辜之  
條以致正氣大傷土被木侮水爲火鑠陰陽不和夜不  
能寐近日肝經愈虧憤急不免時發則殊於治事有妨  
亦欲勉強遏抑則木旺不能自制自揣病證非息心理  
氣難望轉機惟有籲懇天恩賞假一月俾得靜心醫治  
其重要事件仍當力疾籌辦俟假滿後體察病勢能否  
稍爲平復再當奏懇恩施

硃批賞假一箇月欽此

遵籌欽州新界善後事宜摺

光緒十四年六月初四日

竊臣等於光緒十三年六月初一日承准軍機大臣字寄光緒十三年五月初十日奉上諭此次所定粵省界務將勘界大臣意見不合歸入請示之白龍尾江平黃竹等處一律劃歸中國江平黃竹向爲華民聚居白龍尾地方歲祇巡哨一及此後各該處善後事宜應如何設官分汛妥籌布置該督撫務當悉心會商奏明辦理等因欽此仰見 聖主眷顧海疆固圉綏邊之至意當卽恭錄行知藩臬二司海防善後局營務處司道高廉道北海鎮會議詳覆並咨商水陸提督及督辦欽廉防

務提督馮子材去後上年十二月臣之洞巡視粵海各口復親至白龍尾地方登岸查閱該島形勢督同該鎮道府州諮詢籌度僉以欽州地方本屬荒闊難治今復拓地定界幅幘愈廣控制愈難惟有於近邊扼要分設縣治將欽州量爲升改以重事權而資撫馭其白龍尾一處爲北海之蔽遮南溟之門戶上可設礮臺下可泊兵輪宜設專營弁兵駐守島岸再於龍門協酌添師船巡緝洋面庶水陸各專責成邊海自臻靜謐臣之洞回省後與臣大澂切實商辦詢謀僉同當經飭司檄委署欽州知州李受彤兼理靈山縣印務以便統籌早定第

事體繁重飭查覆核往復多次始能定議正擬具奏聞  
復承准軍機大臣字寄光緒十四年四月二十六日奉  
上諭欽州與越南交界劃定後曾諭張之洞等將各該  
處善後事宜妥籌布置迨張之洞巡閱各海口據奏親  
至欽州察看情形其應行籌辦事宜現尙未據奏到此  
次定界將白龍尾江平黃竹等處一律劃入中國扼險  
設防極關緊要其十萬大山一帶田畝膏腴惟素有匪  
踪出沒既經劃入內地其如何安民靖盜著張之洞吳  
大澂悉心會商將新定各界設官分汛一切事宜妥速  
議奏毋再延緩等因欽此茲謹悉心會商詳加酌度查



欽州自隋唐以來皆領縣治隋爲甯越郡領縣六唐爲  
欽州總管府領縣四自宋迄明皆領縣二宋州治卽今  
治明洪武初改欽州爲府繼改爲縣又改爲州隸廉州  
府我朝因之其輿地之廣方六百里有奇分縣而治自  
昔已然今則南自江平長山至白龍尾拓地百餘里北  
自嘉隆江至峒中墟拓地二百餘里地勢增廣邊民新  
附中外時有交涉事件撫綏防範斷非一州牧所能獨  
任若分置同知通判等官與欽州不相統攝勢隔權分  
反生窒礙酌古準今惟有升欽州爲直隸州相度邊要  
分建一縣爲輔車之依資指臂之使查防城司在欽州

西南一百里東達州治西近東興前控白龍尾後通廣西南甯府屬各隘乃欽州西南之衝要明萬厯間曾叛建土城國朝原設有廉防同知駐劄防城乾隆十二年始移防城同知於龍門後復移駐瓊州復由瓊州移改爲赤溪同知茲擬卽其地建置防城縣應請添設知縣一員作爲衝繁難煙瘴要缺分欽州之東興如昔司白龍尾及新收迤南之江平黃竹迤西之嘉隆八莊等處悉隸防城其防城司巡檢舊轄之三娘灣頭二三甲地方與防城隔一海港仍應歸欽州管轄欽州旣劃出防城一縣之地截長補短應於接壤州縣分撥地段數處

增其式廓查廉州府所領合浦靈山二縣皆爲壯縣靈山轄地二十二練疆域最廣與欽州犬牙相錯應分畫靈山縣西南所屬之秋風菩提博我三練青塘練一半地方及林墟司巡檢所駐之陸屋墟與欽州交界之平銀渡縣正南之那思那彭東南之丹竹那麗等處悉隸欽州以上地方均距靈山遠而欽州近地僻俗悍論形勢之宜治理之便均應撥歸欽屬擬請升欽州爲直隸州改爲衝繁難煙瘴要缺以新設之防城縣歸其管轄一切刑名錢穀事件均歸高廉道考核不隸廉州府高廉道應請改爲高廉欽道該道原駐劄高州府城該府

所屬各海口旣非衝要陸路北界廣西容縣亦非極邊  
廉欽邊海交衝今昔情形迥異海防邊備最爲喫重高  
州距廉州陸路六百里距欽州七百餘里緩急難資籌  
辦應將該道移駐廉州府城以便控馭其欽州原設之  
吏目學正及長墩沿海兩司巡檢仍歸欽州管轄其靈  
山縣林墟司巡檢所駐之陸屋墟及所轄之秋風博義  
等練均已撥歸欽州應改爲欽州林墟司巡檢原設欽  
州州判應改爲防城縣縣丞仍駐東興原設防城司巡  
檢改爲防城縣典史欽州如昔司巡檢改爲防城縣如  
昔司巡檢江平一十七甲地方沃衍應增設江平司巡

檢一員並屬防城欽州復設訓導移爲防城縣訓導毋庸再設所有升改添設正佐教雜各缺均係地處極邊防務喫重兼係煙瘴除教職仍歸部選并照舊例煙瘴缺辦理外應擇其人地實在相宜者由外酌量升調揀補分別題咨辦理五年俸滿照煙瘴邊缺之例撤回內地升用題升欽州知州王松齡現任防城司巡檢何元龍係裁缺人員應照例留粵另補擬升欽州直隸州文武學額應請仍照舊額取進新設之防城縣學額擬請歲科兩試各取進文生四名歲試取進武生四名惟欽州距廉州府道路僻遠學臣按試建置考棚支應夫馬

一切諸多不便擬請將新升欽州直隸州并所屬新設防城縣仍附廉州府柵考試此欽州升改添設文職員缺之擬議辦法也新經劃定白龍尾地方重山巨浸界畫中外誠海防一大關鍵擬請添設白龍營陸路都司一員設兵一百名並設該營中軍千總一員左右哨外委二員駐守其地卽歸欽州營參將統轄當與水陸兩提臣籌商查有惠州協副將之中軍都司堪以撥調所遺營務該協右營守備駐劄歸善縣城與府城近在咫尺堪以兼管毋庸再設此外新收各界江平擬增設千總一員新設之防城縣擬增設城守千總一員以北崙

汎千總移駐所遺北崙汎應以思勒外委移補思勒距江平十里堪以兼顧不必再補嘉隆擬設把總一員以三口浪汎移駐三口浪汎應以埔崙汎外委移割埔崙汎以尖山汎把總補割尖山汎離欽州僅三里不必再補板興擬設千總一員以三十六村汎千總移駐三十六村汎距王光汎十五里應歸王光汎兼管毋庸再補除舊有弁兵移駐外所有新設之白龍營陸路都司一營應設兵一百名防城城守千總應設兵三十名江平增置千總應設兵二十名共添設陸路額兵一百五十名其龍門協水師左營所轄汎地悉屬欽州地方如北

崙王光汎等皆與廣西交界鞭長莫及荒遠難稽率多有汎無兵幾同虛設茲當添設營汎之際亟應區分水陸界限一掃積弊整頓操防擬將該協左營原轄之濱海牙山礮臺石龜嶺礮臺漁洲坪漁埔港三口浪紅沙灣等汎及舊有弁兵仍歸該協左營都司管轄其餘近內陸路汎地弁兵概撥歸欽州營參將管轄陸汎中有龍門協左營中軍守備一員分駐東興虛有水師中軍之名應改爲欽州營陸路守備其龍門協左營水師中軍守備事務本係該協左營都司兼管毋庸另設經此次劃撥之後龍門協左營兵額較少應增設中號輪船



一艘酌配練兵四十名增設拖船二號共配練兵七十名歸龍門協左營都司管轄龍門協副將統轄減陸地之汛增海面之船亦於水師名稱其實統計水陸營汛共添設額兵二百六十名查同治九年前督臣瑞麟奏裁冗兵加餉練軍曾將欽州營及龍門協左右營裁減三成額兵六百六十五名現因邊地展拓擬添復水陸兵丁二百六十名邊防緊要不同內地緣營口糧均照粵省練餉向章分別支給添復額數應於廣州等處緝捕輪扒各船所配練兵內裁併移撥毋庸增設白龍尾爲邊海極衝已經擇定地勢擬築礮臺四五座以資控

扼而衛邊氓其購礮築臺事宜卽當籌款舉辦專案奏  
報新設額兵百名力量尙單現以馮子材所部萃軍防  
勇分哨駐防尙可聯絡一氣並擬撥新增之防城江平  
兩千總及東興千總所轄之埔崙外委那馬松柏隘羅  
浮峒三汛地暨原有裁存額兵歸新設白龍營都司管  
轄龍門協所管洋面今已遠至白龍尾以西其地盜匪  
出沒無常且附近洋面時有法船遊弋擬設中號輪船  
一艘尙覺不敷現由省城另派兵輪一艘駐泊白龍尾  
一帶協同往來巡緝其濱海各港汛地盜匪則責成該  
協左營都司督同師船及原有汛兵緝捕內地支河盜

匪則責成欽州營緝捕庶內河外海各有攸司不同前  
此之漫無稽考此又欽州添設水陸營汛之擬議辦法  
也現署欽州知州李受彤署任有年地方利病既熟輿  
情尤爲愛戴現委兼理靈山縣事俾增縣撥鄉各事宜  
一手經理完竣新定中越各界該員均已選擇團總鄉  
正編立保甲前此內地窮民多將田產轉賣越民日久  
遂淪爲越地現已疆理田畝嚴行禁止違者惟該處團  
總鄉正是問其擬設之防城縣所轄五峒田土向來納  
糧僅徵丁銀現在邊防藉資團力自未便遽議升科新  
收江平八莊等處邊民新附應請暫照五峒向章止納

丁銀其五峒地方積年開墾官荒甚多設縣後應令請  
領墾照酌納官租尙有沿海潮荒堪以築圍成田亦准  
民間請領墾照自行堵築候田成熟酌納官租此後戶  
口日增田土日闢隨時察看情形再請升科其欽州防  
城靈山撥分地界所有地丁兵米應卽一律查核清楚  
分別各歸各納至十萬大山在欽州西南一百六十里  
貼浪都地方自廣西上思州樞羊嶺發脈連亘粵東西  
及越南邊境深邃險阻山外可耕之地頗爲不少現在  
欽靈各邊界有提督馮子材所部萃軍分紮廣西上思  
州有提督蘇元春所部分紮內地尙無匪踪出沒仍當

隨時督飭各營於界內嚴密巡緝以靖地方其分茅嶺與越南分界地方尙有漢伏波將軍馬援遺廟當於新收各界要隘按照圖約標明界址以杜混淆侵占之弊其移駐高廉欽道新設防城縣之城垣衙署及白龍營官署兵房應如何籌款營造暨欽州直隸州防城縣白龍營等處文武廉俸役食各項經費一切未盡事宜統俟奉旨允准後詳晰核明分別奏咨辦理

珠批該部速議具奏欽此

寓美粵商稟懇詳議新約以維生計據情上陳摺

光緒十四年  
七月十四日

竊臣等據粵省及香港業金山生理各行店職員陳選  
良等聯名稟稱竊商等在粵垣香港開設金山生理行  
店有年與美國舊金山埠華商行店一脈相通互相維  
繫該處華民往來無阻生理方能茂盛反是則否上年  
洛士丙冷之案未結商賈裹足市面寂寥迨至賠款既  
償商業始漸興復詎近日接寓居舊金山商民函電謂  
中美現定約款禁止華工赴美以二十年爲限未往者  
概不准去已回者不能復往業經議院核定使臣畫押  
憑懇稟達等語查寓美華人約十餘萬眾每歲物故者  
幾三千人回華者數千人是二十年後美國當無華人

足跡矣商等生業所關何堪設想粵東出洋人眾每歲所得懋遷之利不下數百萬金蓋在覓利較易故銷貨亦多如綢緞衣服鞵襪瓷器丸葯油酒茶糖海味醬料之類舉凡華民日用之需無一不取資於中國每歲以千餘萬計而關稅所入亦成鉅款可見華民往美者愈多則華商之財源愈旺不徒有繫民生實亦大關國計且內地遇有水旱偏災華民在外捐助者遞年不下數十萬金以其積蓄裕如故能相率赴義踴躍急公今如禁例果行不獨通商大局有變竊恐商等生理均須停閉由是南洋各埠相率效尤共禁華工是廣肇惠潮各

屬及閩省窮民謀生無策屯聚中土其隱患有不堪設想者或謂新約若定所有華民從前在美歷年被毀物業共二十餘萬元皆可索償未嘗無益不知彼以目前之小利相餌豈可因此而貽永遠之鉅患哉美國此議必曰志在禁華工與華商無涉不知既禁華工則華商勢必不禁而自絕光緒六年美國遣使來華續訂條約聲明華工往美准美國代爲整理或定人數年數之限並非禁止前往至人數年數總須酌中定限等語該國甫經換約卽擬例限禁二十年美之總統以限期太久與約不符改期十年於今已閱六載方幸限期將滿生



業可以重興不意今日復有二十年之禁將使華商生  
業不絕不已上年洛士丙冷一案旣蒙軫恤於前此日  
商務所關尤賴挽維於後查條約雖經使臣畫押尙有  
一年期限允否出自朝廷此時未經互換惟有籲懇俯  
察下情咨達總署堅拒其請則商等合粵垣香港舊金  
山各行店數千家生理數十萬生靈叨沐天恩曷其有  
極等情前來臣等查廣東人滿爲患無業遊民皆恃出  
洋爲謀生之路就美國而論華人十餘萬眾日用飲食  
無一不取資於中土推而至於南洋羣島比比皆是華  
民謀生之路愈廣則中國貨物之銷流愈多華工以力

作而獲值華商卽以販運接濟而收其利事本相因利  
不旁落未有禁華工而不礙華商者也又況美旣作俑  
於先難保南洋各島不踵行於後本年三月間美屬之  
新金山有禁華人登岸之案經英廷駁飭其事暫寢現  
猶有增人稅意使不禁自絕據洋報所載有欲援美國  
成案遣使來華訂約之議倘南洋各島相率效尤概與  
厲禁則華人生理日促商務日微內地無業閒民日多  
所關綦重似不可不預爲之計查光緒六年中美續修  
條約有並非禁止華工前往之條又稱如所定章程與  
中國商民有損可由中國駐美使臣與美國外部公同

妥議中國總理衙門亦可與美國駐京公使公同妥爲  
定議總期彼此有益無損各等語現在使臣張蔭桓籌  
議寓美華人善後事宜所訂細約條款未准錄咨有案  
邇間辦理情形是否如該商民所陳無從懸揣既據合  
詞稟訴於華商生計有關臣等未敢壅於上聞可否敕  
下總理衙門查核利弊設法維持之處出自聖裁  
硃批該衙門知道欽此

兼署撫篆銷假謝恩摺

光緒十四年七月十八日

竊臣前因觸發肝鬱舊疾奏懇賞假調理本年六月二  
十二日差弁賞回原摺奉硃批賞假一箇月欽此茲於

七月十一日承准總理各國事務衙門七月初十日來  
電奉旨本日已有旨令吳大澂署理河東河道總督毋  
庸來京請訓廣東巡撫令張之洞兼署吳大澂接奉電  
旨後卽交卸起程勿稍延緩欽此卽於十八日准撫臣  
吳大澂委員賁送廣東巡撫並大平橋監督各關防暨  
王命旗牌文卷前來臣當卽恭設香案望闕叩頭謝恩  
祇領任事伏念臣久玷疆寄薄劣難勝乃以病困頻侵  
渥蒙賞假辦公之餘勉圖攝養奈木旺土虧等症仍未  
少減假期將滿方擬續假醫調適拜兼署撫篆之命仔  
肩愈重痼疾難瘳恐隕越之滋愆益屏營而罔措惟是

鄭工緊要撫臣吳大澂尅日前赴河督署任自不得不力疾視事以便撫臣交卸起程雖艱鉅非病軀可支而官守無旁貸之責臣惟有勉策衰庸殫圖報稱植孤根而恩愈厚冀邀勿藥之占佩兩綬而事彌繁敢昧匪躬之義期於本任署任公事均無貽誤以仰答高厚鴻慈於萬一

硃批知道了欽此

張文襄公全集卷二十四終

紹興孫家棟校